



1732/7
13.10.22

REPUBLIKA E SHQIPËRISË
KËSHILLI I MINISTRAVE

V E N D I M

Nr. 664 , datë 13.10.2022

PËR

**MIRATIMIN E RREGULLAVE PROCEDURALE TË MARRJES
SË AUTORIZIMIT TË TREGTIMIT TË BARNAVE HOMEOPATIKE**

Në mbështetje të nenit 100 të Kushtetutës dhe të nenit 15, të ligjit nr.105/2014, "Për barnat dhe shërbimin farmaceutik", të ndryshuar, me propozimin e ministrit të Shëndetësisë dhe Mbrojtjes Sociale, Këshilli i Ministrave

V E N D O S I:

I. DISPOZITA TË PËRGJITHSHME

1. Objekti i këtij vendimi është përcaktimi i rregullave procedurale për mënyrën e marrjes dhe rinovimit të autorizimit për tregtim të barnave homeopatike në Republikën e Shqipërisë nga Agjencia Kombëtare e Barnave dhe Pajisjeve Mjekësore.
2. Për barnat homeopatike jepet autorizim për tregtim, si më poshtë vijon:
 - a) Autorizim tregtimi, sipas procedurës së thjeshtuar, e cila është specifike për barnat homeopatike të vendosura në treg pa indikacione terapeutike dhe në formëdozë të tillë, që nuk paraqesin rrezik për pacientin;
 - b) Autorizim tregtimi për barnat homeopatike me pretendime terapeutike për simptoma të lehta vetëkufizuese, që nuk klasifikohen për pajisje me autorizim me procedurë të thjeshtuar.

II. DHËNIA E AUTORIZIMIT TË TREGTIMIT

1. Për dhënien e autorizimit për tregtim, prodhuesi vendas, mbajtësi i autorizimit për tregtim ose përfaqësuesi ligjor i tij (në vijim, kërkuesi), duhet të bëjë kërkesë *on-line* nëpërmjet portalit "e-Albania", si dhe të ngarkojë mandatin e

pagesës, të lëshuar nga banka, për kryerjen paraprakisht të pagesës së caktuar si tarifë për kërkesën. Të ardhurat nga këto tarifa derdhen në buxhetin e shtetit.

2. Kërkesa për dhënien e autorizimit të tregtimit për barna homeopatike në Republikën e Shqipërisë plotësohet nga kërkuesi, si një dokument origjinal në gjuhën shqipe ose gjuhën angleze dhe duhet të përmbajë adresat e sakta të kontakteve të kërkuesit.
3. Kërkesa për dhënien e autorizimit për tregtim plotësohet veçmas për çdo formë dhe dozë farmaceutike, e shoqëruar nga formulari i kërkesës, sipas shtojcës I, që i bashkëlidhet këtij vendimi. Kërkuesi plotëson formularin e kërkesës me të gjitha të dhënat e barit homeopatik, që do të hidhet në treg.
4. Kërkesa për dhënien e autorizimit për tregtim për barna homeopatike duhet të përmbajë:
 - a) emrin e barit homeopatik;
 - b) lëndët homeopatike;
 - c) dozën dhe formën farmaceutike;
 - ç) datën dhe nënshkrimin e personit përgjegjës, të autorizuar nga shoqëria, që duhet të ketë diplomë universitare në mjekësi, farmaci, stomatologji;
 - d) listën e dokumentacionit të ngarkuar në portalin “*e-Albania*” bashkë me kërkesën.
5. Kërkuesi duhet të ngarkojë në portalin “*e-Albania*”, gjithashtu, edhe modulet 1, 2, 3, 4 dhe 5, sipas përcaktimeve në pikën 12, të këtij kreu.
6. Kërkuesi autorizon me shkrim, në shqip ose anglisht, personin përgjegjës për ndjekjen e procedurave të përcaktuara në këtë vendim, i cili ngarkohet në portalin “*e-Albania*”.
7. Personi përgjegjës, që përfaqëson shoqërinë, edhe të huaj, duhet të ngarkojë *on-line* në portalin “*e-Albania*” një deklaratë me shkrim të mbajtësit të autorizimit të tregtimit, që nuk është me seli në Republikën e Shqipërisë.
8. Për dhënien e autorizimit të tregtimit, kërkuesi është i detyruar të ngarkojë *on-line* në portalin “*e-Albania*” të gjitha pjesët e modulit 1, si dhe dokumentacionin, si më poshtë vijon:
 - a) Certifikatën e produktit farmaceutik, sipas modelit të rekomanduar nga Organizata Botërore e Shëndetësisë, lëshuar nga autoriteti përkatës, ku vërtetohet se bari është i pajisur me autorizimin për tregtim dhe qarkullon në vendin referent. Certifikata e produktit farmaceutik duhet të jetë e

vlefshme në kohën e kërkesës për dhënien e autorizimit të tregtimit dhe në rastet, kur kjo nuk specifikohet, të jetë lëshuar jo më parë se 12 (dymbëdhjetë) muaj nga data e ngarkimit *on-line* në portalin “*e-Albania*”. Kjo certifikatë duhet të jetë dokument origjinal, zyrtar ose çdo formë tjetër zyrtare, sipas legjislacionit të vendit, që e ka lëshuar këtë certifikatë;

- b) Certifikatën e praktikës së mirë të prodhimit (në vijim, GMP), e publikuar në faqen zyrtare <http://eudragmdp.ema.europa.eu> (*Eudra GMP*), e vlefshme në momentin e kërkesës. Në rast se nuk është e disponueshme *Eudra GMP*, atëherë do të pranohet një kopje e GMP-së, e vlefshme në momentin e kërkesës (fotokopje e noterizuar në vendin, që ka lëshuar certifikatën e praktikës së mirë të prodhimit (GMP) ose certifikatën e produktit farmaceutik (CPP). Çdo kërkues duhet të ngarkojë një kopje të *Eudra GMP-së/GMP*, fotokopje të noterizuar për një prodhues të produktit përfundimtar, vetëm një herë, duke iu referuar asaj për të gjitha barnat homeopatike, që kanë të njëjtin vend prodhimi, për të gjithë periudhën që GMP-ja është e vlefshme. Kërkuesi ka detyrim ligjor, që në përfundim të vlefshmërisë së një GMP-je të prodhuesit përfundimtar, gjatë procedurës së vlerësimit të dokumentacionit, të ngarkojë në portalin “*e-Albania*” një kopje të noterizuar në vendin që ka lëshuar GMP ose CPP, të GMP-së së re të këtij prodhuesi. Në rastet kur, pavarësisht kryerjes së inspektimit të suksesshëm, nuk është lëshuar GMP-ja, pranohet deklarata zyrtare në origjinal ose fotokopje e noterizuar në vendin që lëshon GMP-në apo CPP-në ose komunikimi zyrtar me *e-mail* nga autoriteti që lëshon GMP-në nga autoriteti shëndetësor përkatës. Nëse një autoritet shëndetësor i caktuar, nuk lëshon format të mirëfilltë GMP-je, konsiderohet i vlefshëm informacioni *on-line* i këtij autoriteti, për sa i përket GMP-së. Agjencia Kombëtare e Barnave dhe Pajisjeve Mjekësore ruan të drejtën të verifikojë informacionin e dorëzuar;
- c) Autorizim tregtimi, certifikatë/vendim në vendin referent (kopje e origjinalit, si dhe përkthimin përkatës në anglisht).

9. Kërkuesi që kërkon autorizim tregtimi është i detyruar të dorëzojë mostra të barit homeopatik, të shoqëruara me certifikatën e tyre të analizës nga vendi që ka lëshuar certifikatën e analizës.
10. Nëse ka më tepër se një kërkesë për të njëjtin përbërës nga kompani të ndryshme, emrat tregtarë të propozuar të barnave homeopatike duhet të jenë të ndryshëm.
11. Për autorizim tregtimi të thjeshtëzuar, dosja e regjistrimit duhet të përmbajë:
- a) të dhënat e barit homeopatik, si më poshtë vijon:

- i. Emrin shkencor ose emër tjetër i përdorur në një farmakope të stokut(eve) homeopatike;
 - ii. Format farmaceutike;
 - iii. Rrugën e administrimit;
 - iv. Shkallën e hollimit që do të regjistrohet.
 - b) të dhënat për prodhimin dhe kontrollin e stoqeve homeopatike, si më poshtë vijon:
 - i. Dosjen, që përshkruan se si merren dhe kontrollohen stoqet homeopatike;
 - ii. Arsyetimin bibliografik të përdorimit homeopatik të stoqeve.
 - c) të dhënat për prodhimin dhe kontrollin e formës së dozimit, si më poshtë vijon:
 - i. Dosjen e prodhimit dhe kontrollit për çdo formë farmaceutike;
 - ii. Përshkrimin e metodës së hollimit dhe fuqizimit.
 - ç) autorizim prodhimi, kopje të noterizuar, të lëshuar për barin homeopatik në fjalë;
 - d) kopjen e certifikatave të regjistrimit ose autorizimit nga vende referente, sipas legjislacionit në fuqi;
 - dh) etiketimin, prezantimin e paraqitjes së jashtme të barit homeopatik, që do të hidhet në treg;
 - e) të dhëna në lidhje me stabilitetin e barit homeopatik.
12. Për autorizim tregtimi për barnat homeopatike dosja plotësohet në formatin e dokumentit të përbashkët teknik (Common Technical Document CTD). Dokumenti i përbashkët teknik përmban modulet, si më poshtë vijon:
- a) Modulin 1: Të dhëna administrative, si: përmbledhja e karakteristikave të produktit (SPC), e cila duhet të përmbajë emrin e produktit, dozën, formën farmaceutike, sasinë e lëndëve aktive, dozën, mënyrën e administrimit, indikimet, kundërindikimet, eksipientët, kohëzgjatjen e vlefshmërisës, paralajmërime të veçanta dhe paralajmërime para përdorimit, etj; etiketimin, fletëudhëzuesin e barit dhe prezantimin e paraqitjes së paketimit primar dhe sekondar;
 - b) Modulin 2: Përmbledhje e dosjes dhe reportet e ekspertit me të dhëna për cilësinë, sigurinë, efikasitetin, cv-në e ekspertëve përkatës;
 - c) Moduli 3: Të dhëna për cilësinë e barit homeopatik;
 - ç) Moduli 4: Të dhëna mbi sigurinë;
 - d) Moduli 5: Efikasiteti/ justifikim për përdorimin homeopatik.

13. Dosja plotësohet në gjuhën shqipe ose në gjuhën angleze.
14. Agjencia Kombëtare e Barnave dhe Pajisjeve Mjekësore, brenda 30 (tridhjetë) ditëve nga paraqitja e kërkesës nëpërmjet portalit “*e-Albania*”, konfirmon vlefshmërinë e kërkesës dhe bën vlerësimin paraprak të dokumentacionit të paraqitur për barin homeopatik, në përputhje me dispozitat e ligjit dhe të këtij vendimi.
15. Në rast se dokumentacioni, pas vlerësimit paraprak, plotëson kërkesat, sipas përcaktimeve në këtë vendim, Agjencia Kombëtare e Barnave dhe Pajisjeve Mjekësore informon kërkuesin.
16. Në rast se dokumentacioni, pas vlerësimit paraprak nuk i përmbush kërkesat, sipas përcaktimeve në këtë vendim, Agjencia Kombëtare e Barnave dhe Pajisjeve Mjekësore informon kërkuesin se dokumentacioni refuzohet, duke specifikuar arsyet e këtij vendimi dhe, në këtë rast, është e nevojshme një kërkesë e re. Tarifa e paguar për kërkesën nuk kthehet.
17. Data e fillimit të procedurës për dhënien e autorizimit të tregtimit, në rast të një kërkesë të vlefshme, konsiderohet data e ngarkimit të dokumentacionit në portalin “*e-Albania*”.
18. Agjencia Kombëtare e Barnave dhe Pajisjeve Mjekësore jep ose refuzon autorizimin e tregtimit për barin homeopatik, sipas procedurës së miratuar dhe në bazë të verifikimit të dosjes.
19. Agjencia Kombëtare e Barnave dhe Pajisjeve Mjekësore vlerëson dokumentacionin për autorizim tregtimi brenda një periudhe prej 120 (njëqind e njëzet) ditësh, nga data e fillimit të procedurës.
20. Në rast se dokumentacioni përmbush kërkesat, sipas përcaktimeve në këtë vendim, Agjencia Kombëtare e Barnave dhe Pajisjeve Mjekësore e kalon atë në Komisionin e Përhershëm të Barnave për shqyrtim të mëtejshëm të dokumentacionit.
21. Në rast se dokumentacioni nuk përmbush kërkesat, sipas përcaktimeve në këtë vendim, Agjencia Kombëtare e Barnave dhe Pajisjeve Mjekësore e njofton kërkuesin në lidhje me vërejtjet dhe mangësitë e konstatuara, si më poshtë vijon:

- a) Në rastet kur kërkohet që kërkuesi të plotësojë mangësitë apo të plotësojë dokumentacion shtesë, ai duhet t'i kryejë veprimet e plotësimit të praktikës, brenda një afati prej 30 (tridhjetë) ditësh nga data e njoftimit;
 - b) Periudha 30 (tridhjetë) - ditore mund të zgjatet në 90 (nëntëdhjetë) ditë, nëse kërkuesi paraqet një letër zyrtare me argumentet përkatëse, ku kërkon zgjatje të kësaj periudhe;
 - c) Në rast se kërkuesi nuk arrin të plotësojë kërkesat brenda afateve kohore, të përcaktuara në shkronjat "a" dhe "b", të kësaj pike, ose dokumentacioni i ngarkuar në portalin "*e-Albania*" nuk është i plotë, procedura për dhënien e autorizimit të tregtimit refuzohet dhe kërkuesi për t'u pajisur me autorizim për tregtim duhet të bëjë një kërkesë të re.
22. Pas dhënies së një vlerësimi pozitiv nga Komisioni i Përhershëm i Barnave, Agjencia Kombëtare e Barnave dhe Pajisjeve Mjekësore përgatit për ministrin përgjegjës për shëndetësinë propozimin për dhënien e autorizimit të tregtimit për barin përkatës homeopatik.
23. Ministri përgjegjës për shëndetësinë miraton me urdhër, dhënien e autorizimit të tregtimit. Pas miratimit nga ministri përgjegjës për shëndetësinë, Agjencia Kombëtare e Barnave dhe Pajisjeve Mjekësore njofton zyrtarisht nëpërmjet portalit "*e-Albania*" kërkuesin për dhënien e autorizimit për tregtim për barin homeopatik, si dhe për tarifën përkatëse që duhet të paguhet.
24. Tarifa paguhet jo më vonë se 40 (dyzet) ditë nga data e daljes së urdhrit të ministrit përgjegjës për shëndetësinë. Tarifa paguhet sipas legjislacionit në fuqi. Të gjitha tarifat e përcaktuara në këtë rregullore paguhen me formatpagesën e publikuar nga Agjencia Kombëtare e Barnave dhe Pajisjeve Mjekësore.
25. Në rast se shoqëria nuk ka paguar tarifën përkatëse, brenda afatit kohor prej 45 (dyzet e pesë) ditësh, atëherë Agjencia Kombëtare e Barnave dhe Pajisjeve Mjekësore bën verifikimin brenda afateve kohore, të parashikuara në Kodin e Procedurave Administrative dhe përgatit propozimin për shfuqizimin e autorizimit të tregtimit të barit homeopatik, i cili dërgohet për miratim te ministri përgjegjës për shëndetësinë.
26. Brenda 30 (tridhjetë) ditëve, pas konfirmimit bankar të pagesës së tarifës përkatëse dhe ngarkimit të saj në portalin "*e-Albania*", certifikata e autorizimit të tregtimit gjenerohet nga portali "*e-Albania*" e nënshkruar elektronikisht. Certifikata e autorizimit të tregtimit gjenerohet me nënshkrim elektronik për çdo formë-doze të barit homeopatik, për të cilin është dhënë autorizimi për tregtim, i cili është i vlefshëm për 5 (pesë) vjet, duke filluar nga data, në të cilën është lëshuar urdhri i dhënies së autorizimit për tregtim.

27. Për çdo ndryshim, që i ndodh barit homeopatik gjatë periudhës 5-vjeçare të autorizimit të tregtimit, kërkuesi është i detyruar ta paraqesë atë pranë Agjencisë Kombëtare të Barnave dhe Pajisjeve Mjekësore, përpara procedurës së kërkesës për rinovim të autorizimit të tregtimit, nëse ky ndryshim është i aplikueshëm për Shqipërinë, sipas kapitullit për ndryshimet.
28. Kërkuesi nuk mund të kërkojë për asnjë procedurë tjetër administrative lidhur me barin homeopatik, për sa kohë nuk është pajisur me certifikatën e autorizimit të tregtimit të gjeneruar nga portali “*e-Albania*” me nënshkrim elektronik.
29. Për të përmbyllur procedurat e vlerësimit në lidhje me një kërkesë të caktuar, Agjencia Kombëtare e Barnave dhe Pajisjeve Mjekësore mund të kërkojë kryerjen e një inspektimi (për verifikim të kushteve dhe procesit të prodhimit) në fabrikën prodhuese. Ky inspektim duhet të kryhet brenda afateve kohore të dhënies së përgjigjes lidhur me kërkesën, duke njoftuar paraprakisht subjektin.
30. Gjatë shqyrtimit të dosjes, Agjencia Kombëtare e Barnave dhe Pajisjeve Mjekësore mund të kërkojë dokumentacion shtesë nga kërkuesi, në mënyrë që të garantojë cilësinë, sigurinë dhe efektshmërinë e barit homeopatik, si dhe të bëjë verifikime të dokumentacionit në agjencitë përkatëse, që kanë lëshuar dokumentacionin zyrtar.

III. RINOVIMI I AUTORIZIMIT TË TREGTIMIT

1. Për të kërkuar rinovimin e autorizimit të tregtimit, kërkuesi bën kërkesë *on-line* nëpërmjet portalit “*e-Albania*” në përputhje me dispozitat e ligjit dhe të këtij vendimi.
2. Kërkesa nëpërmjet portalit “*e-Albania*” për rinovimin e autorizimit të tregtimit duhet të plotësohet nga kërkuesi në gjuhën shqipe ose gjuhën angleze. Kërkuesi, gjithashtu, ngarkon në portalin “*e-Albania*” mandatin e lëshuar nga banka për kryerjen e pagesës së kërkesës. Të ardhurat nga këto tarifa kalojnë në buxhetin e shtetit.
3. Kërkesa nëpërmjet portalit “*e-Albania*”, sipas pikës 1, të këtij kreu, paraqitet veçmas për secilën formë dhe dozë të barit homeopatik dhe shoqërohet nga formulari i kërkesës, sipas shtojcës I, që i bashkëlidhet këtij vendimi. Kërkuesi plotëson formularin e kërkesës me të gjitha të dhënat e barit homeopatik, që do të hidhet në treg.

4. Kërkesa për rinovimin e autorizimit të tregtimit të një bari homeopatik duhet të përmbajë:
 - a) emrin e barit homeopatik;
 - b) lëndën vepruese;
 - c) formën dhe dozën farmaceutike;
 - ç) të dhëna për kërkuesin (emri dhe adresa);
 - d) datën dhe nënshkrimin e personit përgjegjës;
 - dh) listën e dokumentacionit të barit homeopatik të ngarkuar në portalin “*e-Albania*” bashkë me kërkesën.
5. Krahas kërkesës për rinovimin e autorizimit të tregtimit, mbajtësi i autorizimit për tregtim është i detyruar të ngarkojë në portalin “*e-Albania*” modulet 1, 2 dhe 3, sipas përcaktimeve në pikën 12, të kreut II, të këtij projektvendimi.
6. Në lidhje me rinovimin e autorizimit të tregtimit, kërkuesi duhet të bëjë kërkesë *on-line* nëpërmjet portalit “*e-Albania*” brenda një afati kohor prej 90 (nëntëdhjetë) ditësh, para datës së përfundimit të autorizimit të tregtimit.
7. Nëse kërkesa dorëzohet, pas periudhës prej më pak se 90 (nëntëdhjetë) ditësh, para datës së përfundimit të vlefshmërisë së autorizimit, aplikohet një kamatë për vonesat për të kapur afatin 90-ditor, sipas legjislacionit në fuqi.
8. Në rast se nuk ka asnjë kërkesë për rinovimin e autorizimit të tregtimit, deri në fund të autorizimit të vlefshëm të tregtimit, atëherë është e nevojshme të paraqitet një kërkesë e re për dhënien e autorizimit të tregtimit.
9. Agjencia Kombëtare e Barnave dhe Pajisjeve Mjekësore konfirmon vlefshmërinë e kërkesës së paraqitur për rinovimin e autorizimit të tregtimit dhe vlerëson dokumentacionin e barit homeopatik në përputhje me dispozitat e ligjit dhe të këtij vendimi, brenda 30 (tridhjetë) ditëve.
10. Në rast se dokumentacioni, pas vlerësimit paraprak, përmbush kërkesat e këtij vendimi, Agjencia Kombëtare e Barnave dhe Pajisjeve Mjekësore informon kërkuesin.
11. Në rast se dokumentacioni, pas vlerësimit paraprak, nuk i përmbush kërkesat e këtij vendimi, Agjencia Kombëtare e Barnave dhe Pajisjeve Mjekësore informon kërkuesin se kërkesa e tij refuzohet, duke specifikuar arsyet për këtë vendim.

12. Data e fillimit të procedurës për rinovimin e autorizimit, në rast të një kërkesë të vlefshme të tregtimit, është data e ngarkimit në portalin “*e-Albania*” të dokumentacionit.
13. Krahas kërkesës për rinovim dhe dokumentacionit, të përcaktuar në modulën 1, kërkuesi është i detyruar të ngarkojë në portalin “*e-Albania*” edhe dokumentacionin e mëposhtëm:
- a) Autorizimin me shkrim, në gjuhën shqip ose gjuhën angleze, nga shoqëria për personin përgjegjës, i cili duhet të ketë diplomë universitare në mjekësi, farmaci, stomatologji;
 - b) Deklaratën me shkrim nga mbajtësi i autorizimit të tregtimit, që nuk është me seli në Republikën e Shqipërisë, për emërimin e një përfaqësuesi lokal me seli në Republikën e Shqipërisë dhe informacionin e duhur të kontaktit;
 - c) Certifikatën e barit homeopatik, të lëshuar nga autoriteti shëndetësor përkatës, sipas rekomandimit të Organizatës Botërore të Shëndetësisë, në origjinal, ku tregohet se bari është i pajisur me autorizimin për tregtim dhe qarkullon në vendin e origjinës, lëshuar jo më parë se 12 (dymbëdhjetë) muaj nga data e kërkesës nëpërmjet portalit “*e-Albania*”, për të gjitha barnat homeopatike;
 - ç) Certifikatën e praktikës së mirë të prodhimit (GMP), e publikuar në faqen zyrtare <http://eudragmdp.ema.europa.eu> (*Eudra* GMP), e vlefshme në momentin e kërkesës. Në rast se nuk është e disponueshme *Eudra* GMP, atëherë do të pranohet një kopje e GMP-së e vlefshme në momentin e kërkesës (fotokopje e noterizuar në vendin, që ka lëshuar certifikatën e praktikës së mirë të prodhimit (GMP) ose certifikatën e produktit farmaceutik (CPP). Çdo kërkuës duhet të ngarkojë në portalin “*e-Albania*” një kopje të *Eudra* GMP-së/GMP, fotokopje të noterizuar për një prodhues të produktit përfundimtar, vetëm një herë, duke iu referuar asaj për të gjitha barnat homeopatikë, që kanë të njëjtin vend prodhimi, për të gjithë periudhën që GMP-ja është e vlefshme. Kërkuesi ka detyrim ligjor që, në përfundim të vlefshmërisë së një GMP-je të prodhuesit përfundimtar, gjatë procedurës së vlerësimit të dokumentacionit, të ngarkojë në portalin “*e-Albania*” një kopje të noterizuar në vendin, që ka lëshuar GMP-në ose CPP-në, të GMP-së së re të këtij prodhuesi, për të gjitha barnat homeopatike;
 - d) Në rastet kur, pavarësisht kryerjes së inspektimit të suksesshëm, nuk është lëshuar GMP, pranohet deklarata zyrtare nga autoriteti shëndetësor përkatës;
 - dh) Nëse një autoritet shëndetësor i caktuar nuk lëshon format të mirëfilltë GMP-je, konsiderohet i vlefshëm informacioni *on-line* i këtij autoriteti, për sa i përket GMP-së. Agjencia Kombëtare e Barnave dhe Pajisjeve Mjekësore ruan të drejtën të verifikojë informacionin e dorëzuar;

- e) Autorizim tregtimi, certifikatë/vendim në vendin referent/amendim i fundit të MA-së, kopje e origjinalit, si dhe përkthimi përkatës në gjuhën angleze.
14. Për të gjitha barnat homeopatike, përveç dokumentacionit të përcaktuar në pikën 13, të këtij kreu, kërkuesi duhet të ngarkojë në portalin “e-Albania” edhe dokumentacionin e mëposhtëm:
- a) Përmbledhjen e karakteristikave të produktit (versioni i fundit);
 - b) Fletudhëzuesin në gjuhën shqipe, sipas përcaktimeve të bëra në rregulloren e miratuar nga Agjencia Kombëtare e Barnave dhe Pajisjeve Mjekësore, si dhe atë në gjuhën angleze;
 - c) Një kopje e miratimit të listës të të gjithë ndryshimeve të strukturës përbërëse të barit homeopatik, si dhe ndryshimet që janë miratuar në Shqipëri gjatë 5 (pesë) viteve të autorizimit të tregtimit;
 - ç) Paraqitjen grafike (*mock-up*) të paketimit parësor dhe atij të jashtëm;
 - d) Kërkuesi, që kërkon rinovim të autorizimit të tregtimit është i detyruar të dorëzojë mostrat e shoqëruara me certifikatën e tyre të analizës të barit homeopatik për verifikimin e cilësisë së tij.

IV. DISPOZITA TË FUNDIT

Ngarkohen ministria përgjegjëse për shëndetësinë dhe Agjencia Kombëtare e Barnave dhe Pajisjeve Mjekësore për zbatimin e këtij vendimi.

Ky vendim hyn në fuqi pas botimit në “Fletoren zyrtare”.

K R Y E M I N I S T R I

EDI RAMA

Në mungesë dhe me porosi

ZËVENDËSKRYEMINISTRI

BELINDA BALLUKU

**MINISTRI I SHËNDETËSISË
DHE MBROJTJES SOCIALE**

OGERTA MANASTIRLIU

AKBPM MA Form Nr. 1

AGJENCIA KOMBËTARE E BARNAVE DHE PAJISJEVE MJEKËSORE Rruga e Dibrës, Nr. 359/1, Tiranë, Shqipëri	Data e Marrjes:	Nr. Prot:
	Data e fillimit të aplikimit :	
Aplikim për dhënie e Autorizimit të tregtimit për një bar		

(Për t'u plotësuar nga AKBPM)

Deklarimi dhe firma

Emri i barit (i shpikur):

Doza(t):

Forma farmaceutike:

Lëndë (t) vepruese:

Mbajtësi i Autorizimit
për Tregtim:

Personi i autorizuar për
komunikimin
në emër të aplikantit*:

Konfirmohet se të gjitha të dhënat ekzistuese lidhur me cilësinë, sigurinë dhe efektshmërinë e barit përmbahen në dosjen e barit siç është e kërkuar dhe në mostrat e produktit përfundimtar dhe lëndët aktive të nevojshme për analizë;

* Bashkëngjitur letra e autorizimit për komunikim/firmë në emër të aplikantit dhe marrëveshja me Agjencinë.

** Bashkëngjitur mostrat (në paketimin përfundimtar me etiketimin përfundimtar), në sasi të mjaftueshme për të lejuar një shqyrtim të plotë dhe verifikimin e metodave të kontrollit të përdorura nga prodhuesi (lëndët referuese nq.s. referohen në procedurat e kontrollit).

*** Tarifa duhet të paguhet nga aplikanti jo më vonë se 60 ditë, pasi ka marrë formularin e aplikimit për autorizimin për tregtim dhe faturën nga Agjencia.

1. Lloji i barit dhe tipi i aplikimit**1.1 Lloji i barit³**

- (i) Lëndë(-ët) aktive kimike (iii) Barna Bimore (v) OTC
(ii) Lëndë (-ët) aktive biologjike (iv) Të tjera (Specifiko)
(Shëno kutinë (-të) me X)

1.2 Tipi i aplikimit

Procedurë e përshpejtuar e aplikimit: Procedure normale aplikimi:
Specifiko: Specifiko vendin:

2. Të dhënat e aplikimit**2.1 Emri tregtar (i shpikur) i barit****2.2 Emri i lëndës (ve) vepruese****2.3 Indikimet terapeutike të propozuara**

Kodi ATC:

(për indikimet kryesore)

2.4 Forma dhe doza farmaceutike**2.5 Rruga(-ët) e administrimit****2.6 Paketimi dhe përmasat e paketimit (bashkëngjitur lista me prezantimet e paketimit ose mostrave)**

(i) Paketimi pasesor:	(ii) Paketimi i jashtëm:	(iii) Madhësia (të) e paketimit:
(iv) Periudha e vlefshmërisë së barit:	(v) Periudha e vlefshmërisë së barit (pas hapjes së parë të bliserit):	(vi) Periudha e vlefshmërisë së barit (pas përzierjes ose tretjes):

2.7 Përmbledhja e karakteristikave të produktit farmaceutik (SPC)

Anglisht Gjuhë të tjera (opsionale) (Specifiko):

2.8 Package Leaflet proposal

Shqip dhe Anglisht ose Të tjera (Specifiko):

2.9 Mbajtësi i Autorizimit për tregtim / personat e kontaktit / kompania

(i) Aplikanti (Mbajtësi i ardhshëm i Autorizimit për tregtim):

Emri i kompanisë:

Shteti:

2.10 Prodhuesi(-ët)

Emri i kompanisë:

Shteti:

Bashkëngjitur origjinali/ kopje e noterizuar e vlefshme e autorizimit të prodhimit

3. Dokumentacioni bashkëngjitur

		Po	Jo/Tjetër
3.1	Autorizimi nga kompania për personin përgjegjës, i cili duhet të ketë një diplomë në mjekësi, farmaci, stomatologji	<input type="checkbox"/>	<input type="checkbox"/>
3.2	Një deklaratë me shkrim nga mbajtësi i autorizimit të tregtimit i cili nuk është me seli në Republikën e Shqipërisë për emërimin e një përfaqësuesi lokal me seli në Republikën e Shqipërisë dhe informacionin e duhur të kontaktit.	<input type="checkbox"/>	<input type="checkbox"/>
3.3	Çertifikatë e produktit farmaceutik (CPP) specifiko:	<input type="checkbox"/>	<input type="checkbox"/>
3.4	Mostra të produktit farmaceutik përfundimtar + çertifikatë analize	<input type="checkbox"/>	<input type="checkbox"/>
3.5	Standard Reference ose standarti i punës i lëndës vepruese + çertifikatë analize	<input type="checkbox"/>	<input type="checkbox"/>
3.6	Përmbledhje e karakteristikave të produktit farmaceutik	<input type="checkbox"/>	<input type="checkbox"/>
3.7	Fletëudhëzuesi, propozimi i paketimit (në Shqip, në Anglisht dhe/ose në gjuhë të tjera)	<input type="checkbox"/>	<input type="checkbox"/>
3.8	GMP (Certifikata e praktikës së mirë të prodhimit,) e prodhuesit (-esve)	<input type="checkbox"/>	<input type="checkbox"/>
3.9	Çertifikatë/vendim i Autorizimit për tregtim	<input type="checkbox"/>	<input type="checkbox"/>
3.10	Përmbledhje e dosjes në format CTD	<input type="checkbox"/>	<input type="checkbox"/>
3.11	Prezantimi grafik i paketimit të jashtëm dhe atij parësor të barit	<input type="checkbox"/>	<input type="checkbox"/>
3.12	Moduli 2	<input type="checkbox"/>	<input type="checkbox"/>
3.13	Moduli 3	<input type="checkbox"/>	<input type="checkbox"/>
3.14	Moduli 4	<input type="checkbox"/>	<input type="checkbox"/>
3.15	Moduli 5	<input type="checkbox"/>	<input type="checkbox"/>

Numri i CD -e:

Documentacioni për:	I pranuar <input type="checkbox"/>	I refuzuar <input type="checkbox"/>
Firma e specialistit të Sektorit të Regjistrimit të AKBPM :		
Firma e Shefit të Sektorit të Regjistrimit të AKBPM :		
Data		(për t'u plotësuar pranë AKBPM)

Parapagesë prej 100 € për çdo formë/dozë të aplikuar për marrjen e autorizimit të tregtimit:
Sipas parashikimeve të ligjit Nr. 104/2015 datë 31.07.2014 “Për barnat dhe shërbimin farmaceutik”

Tarifa e bankës duhet të paguhet nga aplikanti.

Agjencia Kombëtare e Barnave dhe Pajisjeve Mjekësore
Raiffeisen BANK- Tiranë, Shqipëri
Nr. i llogarisë. 0104030780
Konfirmimi i parapagesësData. / / 2015

DREJTOR

Emër MBIEMËR

AKBPM MA Form Nr. 2

AGJENCIA KOMBËTARE E BARNAVE DHE PAJISJEVE MJEKËSORE Rruga e Dibrës, Nr. 359/1, Tiranë, Shqipëri	Data e Marrjes:	Nr. Prot:
	Data e fillimit të aplikimit :	
Aplikim për dhënien e Rinovimit të Autorizimit të tregtimit për një bar		
(Për t'u plotësuar nga AKBPM)		
<u>Deklarimi dhe firma</u>		
Emri i barit (i shpikur):	<input type="text"/>	
Doza(t):	<input type="text"/>	
Forma farmaceutike:	<input type="text"/>	
Lëndë (t) vepruese:	<input type="text"/>	
Mbajtësi i Autorizimit për Tregtim:	<input type="text"/>	
Personi i autorizuar për komunikimin në emër të aplikantit*:	<input type="text"/>	
<p>Konfirmohet se të gjitha të dhënat ekzistuese lidhur me cilësinë, sigurinë dhe efektshmërinë e barit përmbahen në dosjen e barit siç është e kërkuar dhe në mostrat e produktit përfundimtar;</p> <p>* Bashkëngjitur letra e autorizimit për komunikim/firmë në emër të aplikantit dhe marrëveshja me Agjencinë.</p> <p>** Bashkëngjitur mostrat (në paketimin përfundimtar me etiketimin përfundimtar), në sasi të mjaftueshme për të lejuar një shqyrtim të plotë dhe verifikimin e metodave të kontrollit të përdorura nga prodhuesi</p> <p>*** Tarifa duhet të paguhet nga aplikanti jo më vonë se 60 ditë, pasi ka marrë formularin e aplikimit për rinovimin e autorizimit për tregtim dhe faturën nga Agjencia.</p>		

1. Lloji i barit**1.1 Lloji i barit³**

- (i) Lëndë(-ët) aktive kimike (iii) Barna Bimore (v) OTC
(ii) Lëndë (-ët) aktive biologjike (iv) Të tjera (Specifiko)
(Shëno kutinë (-të) me X)

2. Të dhënat e aplikimit**2.1 Emri tregtar (i shpikur) i barit****2.2 Emri i lëndës (ve) vepruese****2.3 Indikimet terapeutike të propozuara**

Kodi ATC:

(për indikimet kryesore)

2.4 Forma dhe doza farmaceutike**2.5 Rruga(-ët) e administrimit****2.6 Paketimi dhe përmasat e paketimit (bashkëngjitur lista me prezantimet e paketimit ose mostrave)**

(i) Paketimi paresor:	(ii) Paketimi i jashtëm:	(iii) Madhësia (të) e paketimit:
(iv) Periudha e vlefshmërisë së barit:	(v) Periudha e vlefshmërisë së barit (pas hapjes së parë të bliserit):	(vi) Periudha e vlefshmërisë së barit (pas përzierjes ose tretjes):

2.7 Përmbledhja e karakteristikave të produktit farmaceutik (SPC)Anglisht Gjuhë të tjera (opsionale) (Specifiko):**2.8 Package Leaflet proposal**Shqip dhe Anglisht ose Të tjera (Specifiko):**2.9 Mbjajtësi i Autorizimit për tregtim / personat e kontaktit / kompania**

(i) Aplikanti (Mbjajtësi i ardhshëm i Autorizimit për tregtim):

Emri i kompanisë:

Shteti:

2.10 Prodhuesi(-ët)

Emri i kompanisë:

Shteti:

Bashkëngjitur origjinali/ kopje e noterizuar e vlefshme e autorizimit të prodhimit

Sekretari i Përgjithshëm

Engjëll AGAÇI



AKBPM FORMULAR APLIKIMI Nr.2

3. Dokumentacioni bashkëngjitur

		Po	Jo/Të Tjera
3.1	Autorizimi nga kompania për personin përgjegjës, i cili duhet të ketë një diplomë në mjekësi, farmaci, stomatologji	<input type="checkbox"/>	<input type="checkbox"/>
3.2	Një deklaratë me shkrim nga mbajtësi i autorizimit të tregtimit i cili nuk është me seli në Republikën e Shqipërisë për emërimin e një përfaqësuesi lokal me seli në Republikën e Shqipërisë dhe informacionin e duhur të kontaktit.	<input type="checkbox"/>	<input type="checkbox"/>
3.3	Çertifikatë e produktit farmaceutik (CPP) specifiko:	<input type="checkbox"/>	<input type="checkbox"/>
3.4	Mostra të produktit farmaceutik përfundimtar + çertifikatë analize	<input type="checkbox"/>	<input type="checkbox"/>
3.5	Përmbledhje e karakteristikave të produktit farmaceutik	<input type="checkbox"/>	<input type="checkbox"/>
3.6	Fletëudhëzuesi, propozimi i paketimit (në Shqip, në Anglisht dhe/ose në gjuhë të tjera)	<input type="checkbox"/>	<input type="checkbox"/>
3.7	GMP (Çertifikata e praktikës së mirë të prodhimit,) e prodhuesit (-esve)	<input type="checkbox"/>	<input type="checkbox"/>
3.8	Çertifikatë/vendim i Autorizimit për tregtim	<input type="checkbox"/>	<input type="checkbox"/>
3.9	Përmbledhje e dosjes në format CTD	<input type="checkbox"/>	<input type="checkbox"/>
3.10	Lista e të gjitha variacioneve që janë aprovuar në Republikën e Shqipërisë në periudhën 5-vjeçare të autorizimit të tregtimit të barit. Kopje të të gjitha aprovimeve të këtyre variacioneve.	<input type="checkbox"/>	<input type="checkbox"/>
3.11	Prezantimi grafik i paketimit të jashtëm dhe atij parësor të barit	<input type="checkbox"/>	<input type="checkbox"/>
3.12	Raporti i Ekspertit mbi cilësinë e produktit	<input type="checkbox"/>	<input type="checkbox"/>
3.13	Raporti i Ekspertit mbi dokumentacionin jo-klinik	<input type="checkbox"/>	<input type="checkbox"/>
3.14	Raporti i Ekspertit mbi dokumentacionin klinik	<input type="checkbox"/>	<input type="checkbox"/>
3.15	Përshkrimi dhe përbërja e barit	<input type="checkbox"/>	<input type="checkbox"/>
3.16	Procesi i prodhimit	<input type="checkbox"/>	<input type="checkbox"/>
3.17	Kontrolli i cilësisë së barit	<input type="checkbox"/>	<input type="checkbox"/>
3.18	Stabiliteti i barit	<input type="checkbox"/>	<input type="checkbox"/>

Numri i CD-e :

Documentacioni për:	I pranuar <input type="checkbox"/>	I refuzuar <input type="checkbox"/>
Firma e specialistit të Sektorit të Regjistrimit të AKBPM :		
Firma e Shefit të Sektorit të Regjistrimit të AKBPM :		
Data:		
Data e fundit e Autorizimit për Tregtim:	(për t'u plotësuar pranë AKBPM)	

Parapagesë prej 100 € për çdo formë/dozë të aplikuar për marrjen e rinovimit të autorizimit të tregtimit:

Sipas parashikimeve të ligjit Nr. 104/2015 datë 31.07.2014 "Për barnat dhe shërbimin farmaceutik"

Tarifa e bankës duhet të paguhet nga aplikanti.

Agjencia Kombëtare e Barnave dhe Pajisjeve Mjekësore

Raiffeisen BANK- Tiranë, Shqipëri

Nr. i llogarisë. 0104030780

Konfirmimi i parapagesësData. / / 2015

DREJTOR

Emër MBIEMËR

NR.PROT. 4990/3
DATË 13.10. 2022

MINISTRISË SË SHËNDETËSISË DHE MBROJTJES
SOCIALE
AGJENCISË KOMBËTARE TË BARNAVE DHE
PAJISJEVE MJEKËSORE
QENDRËS SË BOTIMEVE ZYRTARE

Sekretari i Përgjithshëm

Engjëll AGAÇI



Engjëll Agaçi